

REGIONAL NEWS

HEADLINES:-

1. India hnampa Mahatma Gandhi pianchamphaphak vawi 156-na, Gandhi Jayanti pualin tukin khan Larsap Gen. Vijay Kumar Singh leh Sawrkara mi pawimawh dangte'n zahna an lantir.
2. Kumin Thingtam vanga sazu puang chuan Mizoram district 11-a khaw 122 a chungkaw 3,983 thlawhhma a buh leh thlai a tichhe nasa hle.
3. Mamit District kawng chu lirthei tlan hleih theih loh khawpa a chhiat avangin siamthat a nih hma chu vawiin atangin Buhfai phur truck a tlan tawh dawn lo.
4. Defence Minister Rajnath Singh-a'n na taka Pakistan vaukhanin Sir Creek huamchungah thil pawl a thlen chuan na taka chhan let a ni ang, a ti.

<><><>

GANDHI JAYANTI

India hnampa Mahatma Gandhi pianchamphaphak vawi 156-na, Gandhi Jayanti pualin tukin khan Larsap General (Dr) Vijay Kumar Singh (Retd) leh Mizoram Sawrkara mi pawimawh dangten zahna an lantir.

Tukin dar 7:30 a Gandhi Jayanti pual a PUC Campus, College Venga Mahatma Gandhi lima pangpar dah a, zahna lantir zingah hian Acting Chief Minister Pu Vanlalhlana, Mizoram Legislative Assembly Speaker Pu Lalbiakzama, Environment, Forest & Climate Change Minister Pu Lalthansanga leh Health & Family Welfare Minister Pi Lalrinpuui te bakah Chief Secretary Pu Khilli Ram Meena, DGP Pu Sharad Agarwal leh Sawrkar hotulu dangte an tel a. Hun hman zawh hian Larsap leh official-te chuan Pu Gandhi-a ngaihpawimawh faina leh vantlang rawngbawlina lantir nan Swachhata hi Seva pualin tual an phiat fai a ni.

Aizawl veng hrang hranga local council leh YMA branch-te huaihawtin veng chung thenfai hnatlang an thawk a. Khaw chhe karah mi thahnem tak hnatlangin an thawk chhuak a ni.

<><><>

SWACHHATA HI SEVA

Mizoram district hrang hrangah Faina beihpui thlakna, 'Swachhata Hi Seva' leh Gandhi Jayanti pualin vawiin khan Faina hnatlang huaihawt a ni.

Champhai ah chuan SHS Campaign Closing/Swachh Bharat Diwas leh Gandhi Jayanti puala faina hnatlang hi hmun hrang hrangah kalpui a ni a, hetah hian Vengsang KTP, VC, YMA, MUP, MHIP, UD&PA Department leh PHE Department te atangin mi 150 vel thawk chhuak chuan bawlhhlawh Garbage bag 20 ai a tam chhar khawmin, an paih nghal a. Hemi zawh hian SHS kharna hun hman nghal niin, Champhai bawrhsap Pu Mohammad Aaquib chuan kalkawm te hnenah SHS campaign tawp mahse faina kawnga hma la chhunzawm zel turin a chah.

Lungleiah pawh September ni 17 atanga vawiin thlengin 'Swachhata Hi Seva' campaign kalpuiin, tukin khan Local Council thenkhat huamchungah vengchung tifaiin YMA an hnatlang a, Lunglei a veng /Local Council lian ber zing a mi, Bazar veng Local Council member leh

Mizo hmeichhe zaithiam, AIR Artist ni mek Pi Siamthangi Hauhnar chuan Hriselna leh faina chu thil inkawp tlat a ni tih sawiin, kum 30 dawn chu zingkarah taksa sawizawiin ke a kal thin a, In a thlen veleh an In kawt zawn vel te phiat faiin mi bawlhhlawh paih a chhar thin a ti.

Haulawngah pawh Clean and Beautification Committee bultumin FAINA Hnatlangpui neih a ni a, mi 300 velin Haulawng khawchhung hmun hrang hrang an tifai a. Village Council Vice President Tv. C. Lalmuanawma chuan Haulawng khawtlangin faina kawngah nasa taka hma an lak thu a sawi.

Saitualah chuan vawiin khan DC Conference Hall-ah faina kawnga hmalatu Mahatma Gandhi pian cham pual “Swachhata Diwas” lawmna hun leh faina beihpui thlakna “Swachhata Hi Seva 2025 Campaign” kharna hun hman a ni a, Pu Lallawmawma, Addl DC. chu khuallian niin a hmanpui a, khuallian chuan faina kharna hun ni mah se kalkhawmte chu faina leh thianghlimna kawnga theih tawp chhuah zel turin a sawm a ni.

<><><>

CM

Chief Minister Pu Lalduhoma’n Thenzawl Peace City din tuma chak taka hmalak mek a ni a, hei hian nasa takin Thenzawl hmelhmang a thlak dawn a, mipuite inhawng taka inbuatsaih a ngai a ti

He thu hi vawiina a bial Thenzawl Vengthlang Branch YMA kum 25 na (Silver Jubilee) lawmna, Victoria English School-a buatsaih a hmanpui na-ah sawiin Pu Lalduhoma chuan Thenzawl Peace City din tura hmalakna chu chak taka an kalpui mek thu a sawi a, khawpui hmelhmang thlak danglam thei tur anih avangin Thenzawl mipuite inrin a tul thu a sawi. Chief minister chuan Mizorama Missionary an lo luh khan rinna thar an rawn keng a ni satliah lova. Biak in leh inkhawm te, nitin sikulte an rawn kenglut tel a. Kristian an pung deuh deuh va. Zirna kan ngaihlu tial tial tih sawiin Zawlbuk kha a rawn hliahkhuh a ti a. YMA chuan Zawlbuk thatna leh tangkaina a chhawm tih sawiin Kristianna pensan lovin Zo nun ze mawi vawnhim leh thangtharte hnena hlan chhawn hna te, hnamzia leh culture venhim te, thu leh hla, lam, rimawi leh hmunhma hlui vawnhim te a kalpui a ni a ti.

Vengthlang branch hi kum 2000 a din a ni a, a hma chuan Bazar Branch hnuaia section pakhat a ni thin. Tunah hian branch chhungah in ding 302 awmin an zinga 290 hi luah lai an ni a, mihring hi 1450 a cheng mek a, an zinga 780 hi hmeichhia an ni a. YMA member hi 925 an awm mek a ni.

<><><>

RODENT OUTBREAK

Kumin Thingtam lo thleng a, rawthing tam vanga sazu puang chuan Mizoram district 11-a khaw 122 a chhungkaw 3,983 thlawhhma a buh leh thlai dang a tichhe nasa hle.

Agriculture & Farmers' Welfare director Pu R. Lalnunzira'n Akashvani Aizawl a hrilh danin Mizoram puma buh leh thlai chinna hmun hectare 6,869 point 954 a hectare 1,737 point 354-ah sazu puang hi an che a. Buhpui leh thar rang bakah buhban hmunte an tichhia-in buh an ei nasa a, chu bakah thlai dang - vaimim, fu, behlawi, sawhthin, chhawhchhi, hmarcha, mai, bawkbawn leh fanghma thlengin an ei a ni. Sazu puanna hmuna District Agriculture Officer (DAO)-te chuan an bial theuhah sazu thahna hlo/tur bromadiolone leh zinc phosphide an sem a, loneitute

hnenah tur hmanga sazu hrai dan an zirtir a. Chu bakah Mizovin tun hma atanga sazu manna atana an thang hman thin 'vaithang', 'mangkhawng' leh 'thangchep' te hmang uar turin an chah bawk a ni, a ti.

Loneitute chu thang an hmanin a ngai reng hmang lova sazu-in thang a ni tih an hriat chhuah hun awm vela hman thlakthleng thin turin zirtir an ni bawk a. Sazu tur hmanga sazu hrai hi awmze nei zawka kalpui a nih theih na'n khaw hrang hrang VC-te chu thlawhhma zau hrang hrangah sazu hrai beihpui thlak thin turin thu anrawn a. Agriculture & Farmers' Welfare department hnathawkte chuan sazu hraina tur leina atana pawisa a tam taw lo chu an harsatna pakhat a nih thu an sawi a. Sazu puanna khaw thenkhat chu tlawhpawh hleih theih loh leh fur avanga kawng ping tam tak a awm baw avangin harsatna an taw tih an sawi a. Khaw thenkhat chuan an bialtute an hrih lai lutuk avangin sazu hrai hma a an thlawhhma a seh zawh sakte pawh an awm niin an sawi a ni.

District zingah chuan Serchhip district a khaw 16-a loneitu 1,084 zetin Thingtam hi an tuar a. Mamit district-ah chuan khaw awm zawng zawng 45 thlawhhma-ah sazu a puang a, chhungkaw 769-in an tuar a. Aizawl district a khaw 14-ah chhungkaw 561 in an tuar bawk.

Mautam ang bawkin Thingtam hi kum 48 danah Mizoramah a lo thleng ziah a. Kum 1977 kha Thingtam hnahnung ber a ni a, kumin hi Thingtam lo thleng leh tura hrihlawk a ni chung leh chhian lo thleng tur hriat lawk theihna pangngang leh thangnang te a puang chungin sazu tur mamawh taw leina tur pawisa a awm lo chuan sawisel a hlawh hle.

Kum 2006-2008 chhunga Mizorama Mautam rawn zirchiangtu Australian sazu lam zirmi Kenneth Peter 'Ken' Aplin khan sazu pa te hian eitur duhtaw an hmuh loh chuan an note ei an ching a. Mautam leh Thingtam lai chuan mautak leh rawthing rah ei tur duhtaw an neih avangin sazu hi an pung chak ta em em a. An intam chhuah ve leh thlawhhma-ah eitur zawngin an lut a, buh leh bal leh thlai an hmuh apiang an vaihma tawh mai thin niin a sawi a ni.

<><><>

ASF

Tun hnaia Kolasib district-a Saipum rama sanghal ruang an chhar chuan African Swine Fever (ASF) hri a kai tih hmuhchhuah a ni.

Animal Husbandry & Veterinary department hotute hnen atanga thudawn danin Saipum ram chhung ramhnuai a sanghal tlaw an chhar hi an department laboratory-ah a sample te endik a ni a. ASF vaw pulhri a kai ngei tih finfiah a ni chungin Selesih a College of Veterinary & Animal Husbandry laboratory-ah endiktir leh a ni a. Hetah hian ASF vaw pulhri a kai ngei tih kar hmasa Zirtawpni khan nemngheh a ni.

<><><>

UDONGA MONTANA

Saitual district Sihfa ramah tunhnai khan Thangnang a puang chiam a, Thangnang puang hi Mizo pi leh pu te chuan Tam hmahruai niin an sawi bawk thin.

Tuna Sihfa rama Thangnang kai hi September 29 (Thawhtanni) khan an hmu tan a, Sihfa khaw chhuah lam Km 1 vela hla Chul zau ram an tih chu bawhin vawin thleng pawhin Thangnangin a bawh thing leh maute chu a la kur nghek nghuk a, thingzarin a dawl loh hmun thenkhatah chuan a zarin a tliahpuite pawh an awm. Mita hmu tute chuan Thangnang kaina hnuhma leh kalkawng chu thlipui nuai ang maiin a pe sul niin an sawi bawk.

Nimin lam khan Thangnang hi khawng tawh an awm a, mi pakhatin kg 5 te an khawng hman a ni.

<><><>

MTDA

Mamit District kawng chu lirthei tlan hleih theih loh khawpa a chhiat avangin siamthat a nih hma chu vawiin atangin Buhfai phur truck a tlan tawh dawn lo.

Mizoram Truck Driver's Association chuan thuchhuah siamin, khawthlang lam kawng chu hun rei tak atanga chhia a ni a, mipui mamawhna avangin an tlan hram hram thin laiin tun dinhmunah tlan hleih theih loh khawpin a chhe zual a, motor a chhiat phah nasat bakah nunna atan pawh a hlauhawm tak avangin kawng chu tlan ngamna khawpa siamthat a nih hma chuan Buhfai phur truck te chu vawiin October ni 2 atangin an tlan tawh dawn lo tih an sawi.

Hemi chungchanga Akashvani Aizawl zawhna chhangin, MTDA President Pu H Laldingliana chuan hun rei tawh tak atang khan kawng khuar nasa leh chhe lutuk avangin tlu lek lekin an tlan fo a ti a, buhfai an phur thin zatve vel tunhnaia an phur chung pawn kawng khuarah an la tang thova, an lirthei in a tawrh bakah nunna atan a hlauhawm avangin buhfai phur driver te zingah tlan ngam an awm tawh lova, MTDA committee chuan thuneituten kawng khuar zualpui an hnawh sak hma chu tlan tawh loh an rel a ti a. Tun dinhmunah Mamit District kawngchhia avang hian buhfai phur truck 6 chu tlan ngam lovin an ding mek tih a sawi bawh a ni.

<><><>

DEFENCE MINISTER WARNS PAK

Defence Minister Rajnath Singh-a'n na taka Pakistan vaukhanin Sir Creek huamchungah thil pawh a thlen chuan na taka chhan let a ni ang, a ti. Vawiina Bhuj sipai hmunpuia Shastra Pujan lawmna a hmanpuinaah he thu hi sawiin Operation Sindoor kalpui lai khan Pakistan-in Leh leh Sir Creek atanga India invenhimna rawn luhchilh a tumna chu a hlawhchham, a ti a, hetih lai hian India sipaiten Pakistan air defence ruahmanna zawng zawng pholangin Pakistan chu khawiah pawh ni se engtik lai pawhin chhiatna nasa tak an thlen thei a ni, a ti.

<><><>

SEVA PARV

Mipui rawngbawl leh sorkar tha, Seva Parv tih thupui hmanga Prime Minister Narendra Modi-a kaihhruai sorkarin kawng hrang hranga hma a la mekna zingah chungtinin bank account an neihna tur, Pradhan Mantri Jan Dhan Yojana (PMJDY) hlawhtlinna chungchang lo tarlang ila.

PMJDY hi kum 2014-a Pu Modi-a kaihhruai sorkar hmalakna hmasa pawl zinga mi a ni a, tunah hian mi vbch 56 chuanguin Jan Dhan account nei tawhin khawvela scheme lian ber a ni mek a, account nei zinga zaa 67 chu thingtlang leh khawpui tenau a mi niin zaa 56 chu hmeichhia an ni, Jan Dhan account atang hian sorkar atanga hamthatna an dawn turte, bo thlau awm lova an dawn theih phah bakah sum renchem pawimawhzia inzirtirna tha tak a ni bawh a ni.

<><><>